

Afera Schöiferhaldn

Haoernklie, Hahnafouß, Hungerstengl,
Farnwaddl unter oogefluunga Berch-Arln;
Junikäfer fleng ihra Schlaafn
ims Höibäierlaab rim
und im die scharfn Spöiß vern Spöitzgraos.
Brauna Saacheemesn,
mit Fichtnaodln bepackt,
renna ihra Steich zen Haufn,
der wu sa ausspeit
und wöider aufsaucht,
wöi a Vesuv mit Rickwartsgang,
kennt mer maana.

Ober ieber all den klann Zeich
stägt steil wöi a Hauswend
der Schöiferhaufn auf,
a Zickzack, nit schwarz, nit blao, nit grau.
Abermilliona Gesetztafln
mit nex draaf,
bluuß lengst getruckneter Schwaaß
ver den Schöiferbrouch-Ärbetern
vergangener Taoch.
Ann hao ich nuch gekennt,
wöi ich klaa war.
Der hett a kaputts Baa
ver en Sprengschuß, wu ze spät luusgonget.

Af den altn Schöiferhaufn,
dao sen vöilavöil tausnd Schreibtafln,
wäggewarfn,
Schöiferstäft, verbarng und ouderliest,
verschmäihta Daochschöifer,
verwarfna Verwerfing.
Grußa Tafln spitzn raus,
wöisa der Moses sellmaol
raobrocht haot vern Berch ze den Leitna untn,
wu nit woßtn, wos sa wolltn.
Klaana, dicka, karza Schöifer
ling draaf und drim rim,
mancha sen a wing braun ver Eisnerz
odder ieberzuung ver winzinga Flechtna.
Und naoch gibts nuch die ganz klann Schöiferla,
dao derzwischen wachsn sche die Thimianhichela
und es wuchert die Wolfsmillich.

Eigesaaamt
wärd der schöifergedeckt Ranga
ver Bounga und braatestinga Fichtna.
Döi Fichtn sen ieberschitt
mit Maiwuchs
wöi Zuckerhöit,
ober a paarna sen schö die Wipfl verdarrt.

Dröiberhöi ober schreit der Kuckuck wöi toll,
schlecht der Fink und leßt nit naoch.
Es is wöi a tausnd Gahr alts Glockngeleit
mitera uraltn Hausklingl zwischndarch.

Und dös alles drengt nauf
ze dera weißn Wolk,
wu seit Minutna wöi derstarrt
ieber der Schöiferwend stieht,
ieber den dunkln Schöifergottsacker
mit seiner Hitz
und mit den Duft
ver en Frankwaldsummer
und den Wall ver den Baamerna
im Tal duntn,
döi wu sich noolanna an Hang.

Und öich,
öich kratz wöi a uralter
papierluser Staazeitmensch
a Troum Schöifer vull
mit Wärterna.
fer a Gedicht.

Die Kinner lossn derwall,
ouberiehart ver Naochdenkn und Simpeliern,
klaana, flechtnieberzunga Schöiferla
iebern Aoground schwärren,
und ihr Lachn ieberteent
es Klirrn und Zerspringa
töif dao duntn.

